

翰苑新書

第卅五冊

別集卷九之十二

朱表表文

青詞疏語

冊文祝文

謁祈焚黃祝文

祭文

新編翰苑新書卷之九

別集

朱表

內制

明堂大禮前於 天慶觀啓建預告 上九位

五嶽四瀆道場滿散朱表一通 劉後村

伏以宗祈練日將講縟儀先事告期冀歆精意諒天心之
眷顧相歲事之豐登祀典用成皇圖有永

明堂大禮 畢於 天慶觀啓建告謝滿散朱表

一通

前人

伏以奉秬鬯以精裡已蒙加應薦蘋蘩而昭答庸罄微忱
伏願帝鑒孔昭天休滋至九扈奏金穰之喜四時調玉燭
之和

表文

內制

明堂禮畢奏謝 諸陵攢宮表文 前人

伏以歲祠周復備芬芬必二之儀徽福漢陵瞻鬱二葱二之氣威靈如在裡祀充成仰先烈以興懷薦微忱而推謝

青詞

內制

明堂大禮前於 天慶觀啓建預告 上九位

五嶽四瀆道場青詞七通係一詞 前人

伏以剛日載涓將展儀於宗祀先期加謹敢徵福於高穹俯竭精虔仰祈騰相普錫豐年之慶迄臻熙典之成

太乙宮啓建 明堂大禮預告祈晴道場滿散設

醮一千二百分位青詞一首 前人

伏以秩祀杪秋將告虔於重屋先期浹日敢徵福於殊庭今太史之龜筮叶從若有司之籩豆已戒惟陰晴之未定蓋夙夜之靡寧寅班綠章仰祈蒼昊伏願辦香上格列宿

下臨圓魄中天映黃流而同色霽華麗曉儼玉路之無塵

青詞

制司上元青詞

方秋崖

一元始萬物肅迎九炁之臨五福錫庶民丕對三陽之泰適瞻玉境誕啓瓊書臣惟此淮瀆介於邊圉旄頭塵彗屢驚鴻鴈之居蠱尾毒搖未撤貔貅之戍正恐廢犁鋤於春畝願言洗兵甲於天河爰率彝章敷聞艱款敢望歛時景既睠我昌期豈惟淮海之東桑麻如舊將使關河之北草木皆寧此臣至情惟天善應

上元建醮青詞

戴象麓

歲開新序天與物以為春節屆上元吏為民而祈福痛茲南楚三載寇攘加以西疇連年旱歉幸上帝深哀其無告而去歲特畀之有秋民有一飽而惟吏免百憂之責覺今

新歲漸復舊時天賜之休人何以報忻值銀燈之夕肅陳
玉笈之儀上答帝休下祈民既伏願玉清錫羨璇極垂慈
百里風同各安士農工商之業五鄉日靖永消水火盜賊
之虞

督視府開府青詞

方秋崖

王事靡盬邇炎暑以徂征帝命不違政祥飈而有請惟皇
祚采昭假順天伏念臣本乏脩能誤膺煩使躡躡兩地自
知鼯鼠之技窮起視三陟但覺犬羊之腥聞使宸扆未安
於丙枕在廟堂敢諉於甲兵乃將威命以董師遄即陪都
而開府蓋以主憂臣辱事不可以辭難然當內阻外訐材
豈堪於任重惟列聖涵濡之澤至厚惟皇天顧諟之命寢
隆雖臣之愚有相之道用冒聞於上帝其篤祐於我家天
德好生帝心悔禍兵以不殺爲武母驚羽檄之塵國之大
事在戎克固金湯之業凡臣所乞罔敢以私

淮東制司黃錄青詞

方秋崖

虜爲不道長淮厭鋒鏑之腥相寄非材屬部失金湯之固
痛念生靈之塗炭曷伸寃恨於幽泉流涕其滂拊膺何及
臣惟滁支郡當賊要衝心竊危之形勢實難於固守疏聞
屢矣規模盍亟於移屯曾微初是之什三猶覲自存於萬
一憬彼犬羊之南牧分驅豺獸以東侵孤城驟合於重圍
守將誓言於死鬪夫何飛石適會麾軍星竇中營誰則爲
之主者雲崩堅壘天乎尚忍言哉此繇制帥之駕庸坐致
兵民於魚肉敢忘眞薦少塞哀摧伏願簡在穆清愍茲荼
毒忠魂如在足令守虎豹之關羣姓何辜罔俾滯黠黠之
野大軫好生之德亟開悔禍之期

廣東倉入宅青詞

劉後村

起家一出甚矣勞生乘傳載馳幸而善達輒陳悃素冒叩
吳蒼伏念臣久分退藏忽叨臨遣白頭慈母老恋家山黃

叨小兒疾留道路雖百指檀栾而亡恙然寸心隕穫而靡
寧茲選剛辰將趨公宇爰舉祓除之典冀垂覆憐之仁共
願憫此艱勤錫之福順新書方急若烏寬比屋之歎慈舊
學云何夫豈在全家之飽煖誓殫薄力仰吞厚恩

建天香醮青詞

戴象麓

尺地安居竊九重之天庇爐煙致敬焚一片之心香物雖
薄而瀆尊意實存於報本仰祈帝鑒俯察愚衷赦其動作
之愆錫以保全之福常情不知止足愈有愈求惟臣但願
平安無災無難

景獻郎生日青詞

方秋崖

七月流火聿臨初度之期五福錫民式適中元之慶用延
景御肅啓冲科伏念臣世系麟宗恩榮鵠印自頂及踵罔
非君父之仁以口語心莫報乾坤之造永懷際遇敢迪齋
明伏願昊極溥臨寰區嘉靖文王本文百世休有烈光上

帝監觀四方自求伊祐惟忠惟孝不震不騰

福國生日青詞

劉後村

歲華已晚不勝喜懼之情天聽甚卑輒瀝精誠之禱伏念
臣妾頽然衰景屆此始生雖瞻視之逾昏尚筋骸之可勉
老者祝哽祝噎粗適旨甘常情欲安欲生矧侵耄耄敬憑
綠奏輒瀝丹忱伏願矜此餘齡錫之晚福斑衣雜還清溫
相踵於高堂錦誥便蕃湯沐更封於大國

太夫人生日青詞

前人

人羨久生顧餘齡而自慨天無私覆然善願之必從伏念
臣妾某早染世塵晚耽禪悅駸二耄耄豈久不出於鄉閭碌
碌諸兒粗能當於門戶旨甘无闕湯熨少停入以爲衰老
之榮已則有蒲盈之懼茲因誕日敬叩高穹伏願鑒此精
虔昇之壽嘏大國賜湯沐切冀新恩百年日期願庶延暮景

乙卯後村生日青詞

前人

采薪之憂命懸一瞬勿藥之喜恩等再生假以餘齡仁哉
洪造伏念臣某宦情已薄年事寢高去國爲農圃之婦罷
祠絕庖廩之繼尚爲病撓可見身失窮則呼天嘗呻吟而
號痛齋可事帝果奮起於沉綿不揆螻蟻之微輒羞豺獾
之報伏望神祇叶佑星曜順行屏峻伯之書少停湯熨拜
弘景之疏遂挂衣冠

趙端明爲元保安青詞

方秋崖

元茅急難政切鶴鴝之念天地明察豈遺螻蟻之情庸爾
扣於穹隆輒籲聞其疾痛伏念臣長元具官臣某摧頽一
老遭罹百憂立嫂喪明又有進躋之懼女姪夭折不勝嗷
積之悲良用感傷積成衰病忽有來於使者若將屬其子
然請且驚疑遠難候問永惟手足之誼重亟欲腹心之疾
瘳敢以祈禳庶其康復伏願大垂仁育少鑒友共惟有三
荆更借桑榆之暖誰不百歲覲回草木之春

祈雨青詞

六月十三日

戴象麓

六月不雨農望歲以深憂三日爲霖吏率民而哀請合衆
忱而再瀆冀帝意之一回伏念臣某等各無寸長全仰一
稔黍綠謬政遂致常暘自前月以至今苦旱風之爲虐雲
欲幕天而吹散雨絕灑地而捲空雖間沐於沾濡終未蒙
於優渥敬陳雷醮虔叩天闈伏願璇極垂慈玉真賜憫速
回飈馭使南箕不可簸揚立敷雨師浼西江以救轍涸

祈雨青詞

前人

吏慙無狀致時雨之愆期民實何辜叩神天而請命痛惟
彫邑率多旱田土高仰而無源穗方吐而未實政資膏潤
忽苦旱乾農如倒垂吏莫逃責若遲之五日而雨不至則
茫然一歲之計皆空豐荒只決於旦夕之間利害全資於
膚寸之澤爲勢甚亟惟天賜憐錫以甘霖救其殘命重念

數年之轉陟僅此相安全資三日之沾濡俾之一飽

江東祈雨青詞

劉後村

嗟我農夫苦亢陽之為沴惟皇上帝思膏澤之尚屯俯陳
抃揚之情仰清穹窿之聽伏念臣自入疆而采訪知編戶
之創瘼數口之家鮮能宿飽一年之計无仰早收方弥望
以如雲忽兼旬而渴雨深恐子遺之黎庶不能自振於儉
荒惟暑氣之蘊隆欲流金石彼原田之秀實將化董荼列
城若處於焚煖近境統蒙於霑灑倘慳後惠必廢前勞合
一路之哀鳴叫九閭而上訴伏惟矜其誠至賜以感通若
潤澤之敢不盡微臣之職俾滂沱矣庶幾全大造之功

謝雨青詞

戴象麓

閔時不雨屢干鴻造之私降監自天疊拜龍湫之澤雖真
宰未嘗責報然愚情敢不知歸伏念臣某試邑罔功頻年
遭旱每投誠於三井常得請於九閭至神如響之從甘霑

隨車而至茲復蒙於加霈庸敬謝於元功伏願璇極垂慈
玉京賜憫幸令南楚既沾潤澤之仁繼此西成更覲始終
之惠

祈晴青詞

吳雨崑

十月納稼乃久阻於積陰上帝鑒民望特回於洪造曲赦
干和之罪普垂乃粒之恩伏念臣等憂國願豐以食為命
睠今歲穀多不稔半已青空而初冬雨復害成又將黑腐
棲畝殆幾於坐視腰鎌直待於連晴願今天日之清明收
歲俱便庶無田里之愁嘆饑饉潛消

里社禳火

劉後村

思患而豫防人情至切不言而善應天聽甚卑廼率耆倪
共祈穹昊伏念自冬至臘厥證常暘風日燥剛水泉乾涸
連爇接棟深虞沴氣之行曲突徙薪思弭融風之變俗相
恐動古有禳禳懷凜二之深憂遂啓二而上愬伏願錫皇

極之福念民生之艱驅癘鬼之妖咸躋仁壽遂畢方之恠
永息驚譌

為二姪追薦惠州第

前入

丹旄言旋陟岵愴十旬之隔赤章哀籲扣闈冀一念之通
伏念臣等先父臣某奮自孤童安於拙宦補孝子循蘭陔
之什久矣栖遲慕前賢守鬱林之風過於清苦凡今日寸
地把茅之苟有皆平生節衣縮食之所營云胡夏鵬之妖
莫起河魚之疾野吏之亭長在父老共悲善和之宅依然
主人不返雨降露濡動輒淒愴水浮陸走幸無震驚輒伸
入子之情敬采道家之說伏願回乾坤之大造鑿草土之
微忱逝者如斯夫欲承顏而永訣魂兮歸來些寧與魄以
俱沉脫離幽陰周游沖漠

賽願回薦青詞

戴象麓

百年中訣痛深去後之思一念未償代畢生前之願敬殫

誠赤仰清穹蒼伏念臣某亡室某人曩因懷妊之初嘗許
保胎之善所冀誕彌十月入欲天從豈期凶變一朝子亡
毋斷叫呼無地哀訴惟天恐日前之誓未償致身死之魂
猶殫敬為還賽少助超升伏願上聖垂慈列真肆宥三官
罷對頓消黑簿之愆八景超生蚤注朱陵之籍

新編翰苑新書卷之九

別集

新編翰苑新書卷之十

別集

疏語

天基聖節道觀啓建

方秋崖

聰明而作元后有開繞電之祥富壽以祝聖人肅奏望雲
之請春融藥笈天贊蘿圖 皇帝伏願道邁崆峒世縣邾
鄒洛書五十六字休符丕赫於龜文天皇萬八千年歷教
莫窮於鳳紀

天基聖節僧寺啓建

方秋崖

法王貞子為世界主天開夢日之符大地衆生禮毗耶身
入致望雲之祝弘敷玉偈丕贊金輪 皇帝伏願如不動
尊獲無量壽南閻浮提北鬱單越尽被堯仁大周沙界細
入微塵難窮舜曆

天基聖節啓建

劉後村

秦臘俶臨將及春回之候夏正甫建有開震出之祥敢傾
葵藿之心仰祝椿松之筭伏願 皇帝陛下壽齊箕翼福
等岡陵崑丘王母之桃靡煩來獻海上安期之棗不必遠
求 皇太后聖節啓建 戴象麓

日占南陞千齡開壽月之祥星拱東朝百拜祝齊天之壽
藏儀梵典贊慶昌時 壽明皇太后陛下伏願齊光北辰
悟妙西竺千百佛裏比伴無量壽如來億萬年中擁佑
當今新天子

天基聖節道觀滿散

方秋崖

王者大一統肇新紀鳳之元中國有至仁誕啓流虹之旦
權騰羽玉頌浹雲璈恭願如日之升與天無極九五福曰
壽曰富適符華祝之三 八千歲爲春爲秋長熹萬呼之萬

天基聖節滿散

劉後村

春王正月方欣木德之回天子萬年式慶羅圖之永聲興

情之權抃祝睿筭之延洪伏願 皇帝如日之升躰乾之
健邇入爲酒告農扈之屢豐都護奉觴喜邊烽之早息

天基聖節僧寺滿散

方秋崖

現在佛作人天師遙新寶曆長壽王等虛無界光啓瑤樞
香深圓玉之春雲麗側金之瑞恭願及未來世居無上尊
園天爲蓋而方地輿悉超禹會大海運墨而須彌筆莫紀
堯年

進功德疏

劉後村

昊蒼眷命聿開王者之興臣子愛君均願聖以壽輒憑善
頌仰贊脩齡共惟 皇帝陛下保大定功無爲共已大德
者名位必得光紹鴻圖善治則福祿日來駢臻景貺

壽慶滿散

方秋崖

風薰慈極天開必壽之期雲麗殊庭入獻無疆之祝鏘瓊
璈而山立遡珠藥以高呼 皇太后恭願道邁希夷心游

清淨芝翻玉圃莫窮物外之春秋桃熟瑤池不屬人間之雨露

天基聖節放生

方秋崖

惟我有宋其仁如天魚躍鳶飛俱入華胥之國鳳儀獸舞嘉娛長樂之朝於萬斯年自今以始

祈雪疏語

戴象麓

其神切惟冬序常暘雪不時若凶咎之證蓋在來年民有疫癘之憂農有旱蝗之慮二者皆令之責也惟神血食茲土寧不均任此責乎願從三牒之時早見六花之瑞則令之與神庶無愧矣

就靈巖祈雨疏

吳雨巖

種不入土比常時之旱不同心切望雲合一鎮之辭致禱惟我佛不違於本誓念此方皈敬者幾年陰雨膏之要必滿盈而後可大命近止不容感通之更遲

祈雨疏

戴象麓

六月不雨最切農憂三日為霖全資天澤痛惟彫弊之邑屢當劫燬之餘今雖莫居猶多艱食惟望今歲之小稔以救餘生之倒垂况茲近郭之田率多早熟之稻谷垂頭而將實民枵腹以待餐忽早暎之弥旬悲秋成之失望民苟弗食吏將疇依爰瀝控於丹誠乞垂矜於赤子錫以霖霖蘇其焦枯俾早穗之既堅仍晚苗之俱茂窮閭委巷苟或免於啼號下吏小官庶少逃於憂責

就羅巖祈雨疏

游時齋

早不苦禱而雨思屢拜於二天魁為雪悒如焚憂復深於七月哀籲稽望霓之首諄勤奉叩地之誠伏念某等列井受塵聚廬托處生計頃殘於紅首年飢復困於黑膚兩遭時變正不聊生三遇天災豈能堪命自入夏拆電疇之兆至開秋息埳鶴之鳴石且泉枯日如火烈早稻所收空於

無粒晚禾之命危亦懸絲觸目啣酸痛心若割况鄰里均
蒙於時注獨此邦未沐於天恩胡寧瘼我於至斯所恃敢
投之有所更三日不雨可知嗣歲之飢是八月飛霜尤慘
前秋之禍仰瞻靈岳夙眷弊鄉合庶信之精虔遣二生而
躬禱伏願金華駕鶴玉洞呼龍飛雲駕掣風軒速流雨澤
鞭雷車搖電幟盡馮天河閔予瘠土之民轉作豐年之象

謝雨疏

方秋崖

五月而種不入正愆梅潦之黃一雨而苗則興已喜稼雲
之綠靈響斯吞嘉澤惟均曰雨曰暘曰燠曰寒曰風曰時
願調玉燭既種既戒既方既早既堅既好迄至金穰

祈晴疏

吳雨巖

歲本不稔粒食可憂雨復妨收人情益恐青空者既已絕
腰鎌之望黃熟者又未有登場之期垂成若更害成小歉
必至大歉率籲衆感敬扣佛慈急掃陰雲大開天日及時

刈獲俾無禾耳之災傷庶表神靈大副農心之懇

祈晴疏

十月收禾次還願併祈晴

戴象麓

十月穫稻一年之計所關又雨妨農八口之家奚望况艱
歉不堪於去歲而收成全仰於今冬柰積潦之連綿阻及
時之收刈未浸淫而生耳農樵梓以焦心膏費辦香恪陳
淨願雖荷皇天之感格日脚方晴柰何宿靄之陰沉雲頭
復雨彷徨无措老弱奚歸茲衆賽於元因庸再申於前掬
伏望神心垂憫佛眼回光岩谷陰消開一天之霽色倉箱
日入騰萬戶之驩聲

祈晴疏

方秋崖

六月之雨則書雖云志喜三日為霖以往寧不懷憂於以
見化造之難其何厭民情之瀆伏願陰雲解駁陽光開晴
過則為災未害金烏之赫休其時若遄歸石燕之飛

謝晴疏

方秋崖

自春徂夏每虞陰沴之淫維麥有秋式對陽光之赫敢忘
歸貺肅以薦嘉蚕事畢而田事興已罄年豐之喜割者晴
而耕者雨尚邀時若之休

代祈男子疏

戴象麓

切以天上麒麟數載未符於吉夢人間龍鳳何時方見於
喜祥孟軻興不孝之辟伯道起無兒之嘆切效尼山之禱
冀儲崧嶽之靈云云昂宿遺精誕蕭何而安漢長庚入夢
生李白以扶唐佇看照室之祥即獲弄璋之慶英姿同伏
湛稟容兒以堂二餘慶若徐卿生公侯而袞二

許佛願賽還疏

戴象麓

伏呂入圓顛而方趾生長皆天日飽食以煖衣依歸有地
雖天造未嘗責報然凡情豈不知恩伏念某形骸寓宇宙
之間頂踵皆乾坤之賜茅入愚苦不自覺而日用豈能无
非繞投謝過之誠果獲降康之祐一年安靖八口齊全心
日二無虞意外之災此解釋其為感幸固罄敷宣

尉司弓級就本尉廟許佛願乞保捕寇還願

象麓

正直為神肯許陰邪之肆悔慈悲惟佛豈容殺戮之張威
繞控懇祈即蒙矜閔於軍陣恐怖之中而能施無畏使草
木恍惚之狀而皆化為兵羣兇颺除百姓堵按陰功所護
如此人心敢昧收歸爰消吉辰敬賽前願伏願豺狼屏迹
自今永無烽火之虞鴻鴈安居至老不見兵革之事現前
入口等咸乞保全以上父母官更祈庇祐

新編翰苑新書卷之十

別集

王化臺

新編翰苑新書卷之十一

別集

冊文

內制 七首

明堂大禮前一日朝享 太廟

聖祖天尊大帝

劉後村

伏以物本乎天人本乎祖維帝之盛有光義農垂裳之化
合宮之制子載而下猶想其風慶源既衍施及冲眇茲卜
季秋歲事國陽塔佑後人迓續休命

祖宗帝后

劉後村

伏以猗欵我家以聖繼聖帝德之盛若古勛華后範之懿
曰文堯舜遺此艱大集于菲涼屬修宗祀前期以告洋
如在神之格思亦既受祉施于孫子

昊天上帝

伏以帝監四方眷宋不釋惟德是輔詎天我私農扈有積

邊烽息警篤匪人力真宰之功仰觀星象俯練時日曷謂
大饗亦惟小心其億万年對越景命

皇地祇

劉後村

伏以莫厚於坤故能載物王者母事自古則然生齒雖蕃
地道亦敏都入足食歲事垂成后土之功與天同大茲卜
素商肇修宗祈迺薦黃琮以徼終惠

太祖皇帝

劉後村

伏以天厭五季真人勃興黃鉞一麾借壘電掃實開有宋
无窮之基創造孔艱揖遜不有帝庸眷顧詒万子孫仰憲
累朝歲事重屋曷敢不恭威靈在天

太宗皇帝

劉後村

伏以聖矣熙陵舜受堯禪六合一家偃伯崇儒以武戡亂
以仁立國軼漢跨唐與周比隆曾孫纂承懼德弗類屬嚴
大振敢薦微忱詒謀既遠流慶未艾

寧宗皇帝

劉後村

伏以於皇聖考侔德舜文宵衣之勤澣服之儉天輔有德
民懷有仁眇予冲子羹墙如見付托之重大懼弗堂屬修
宗祀嚴父配帝赫二濯二實照臨之

祝文

內制

明堂大祀修整雅飾 太廟 大殿并 四祖殿

合用時前奏告 神御還殿十七首劉後村

伏以練日精禋前期藻飾迨茲竣事將以妥靈維列聖之
頌歆鑒冲人之寔奉

正奉安十七首共一詞

劉後村

伏以有司飾設奕二孔新列聖威靈洋二如在剛辰允協
神御迺安佑我後人成茲熙事

仲秋潮旺祭告 南瀆大江昭靈孚應威德博濟

王一首

劉後村

伏以一馬渡江六龍駐浙惟天設險拱護行闕川后波臣
受職于朝璧靡沉河弩不射潮茲卜李秋率修大報徼福
尔神前期以告

從祀五廟一首 忠武英烈靈衛顯聖王 靈濟

顯佑威烈昭順王 英烈王 忠應協貺聖佑公

善應安濟孚佑顯衛侯 劉後村

伏以六飛省方百神受職濤江无波如行枕席農畝有秋
相安耕織維彼小民謁焉必獲矧國大祀敢不以白捍我
金陵相我賢穡既成熙事亦永血食

蒲散 五嶽四瀆三首 共一詞 劉後村

伏以國家大饗預涓剛辰川嶽靈祇首列祀典属將歲事
敢不告虔相我緝儀冀神陰賜

明堂大祀分詣祭告 九宮貴神 劉後村

伏以國之大祀十用剛日天之貴神祭有常儀即壇而享
以徼靈貺既相熙事且祈豐年

分祭 太社 太稷二首 共一詞 劉後村

伏以自古建國莫重於社太稷改云社著在祀典不屋而壇
雨暘必謁况乎禋類敬奉牲幣且謝且祈

分祭 后土勾龍氏 后稷氏 劉後村

伏以三歲大報咸秩百神惟勾龍氏后稷改云推后稷氏有功万世
乃飭祀典寔奉絜粢願相歲事溥歌華黍

明堂大祀前二日朝獻 景靈宮分詣 祖宗帝

后一首 劉後村

伏以涓剛筮祀先事告期將礼有嚴方奉周京之籩豆孝
思尤切仰瞻漢廟之衣冠尚塔後人迄成熙典

明堂礼畢祭謝 嶽瀆一首 劉後村

伏以比選吉辛肇修宗祀寅畏嚴恭之念可質幽明濛鴻

業峨之神若通盼蠻遠茲成礼敢不薦忱

明堂大礼畢告謝 五嶽四瀆 劉後村

伏以屬者大饗徧于羣神爰及熙成莫非騰相竭精忱而推謝冀盼蠻之頌歆 已上 並係內制祝文

督視府拜茶 方秋崖

某待罪二府不能宣皇威遏寇虐以上勤天子之憂願乃發大號俾出視師任重力綿夙夜懼弗克勝任惟古受成于李獻馘于泮兵固非司馬法也聖門大訓具在六經昔者嘗切聞之某不敢諉曰軍旅之事未之李

謁學 建陽宰 劉後村

昔者聖門弟子莫不以治邑為難况今之邑尤難於夫子之時某之才不足進於弟子之列特以格法來領民社其何以慰塞是邦父兄耆舊之心哉抑權力雖輕法令雖密若夫離於理 而背於訓者某不忍為也况夫子巍然

臨之乎

帥慕謁學 方秋崖

某抵惟先聖之言曰軍旅之事未之學也而某何人敢贊籌幄其敬率聖訓勉哉維忠

除漕謁學 劉後村

戍久而士不飽糴多而民難食今日上下之通患也上既妙選常平使者專任糴事復使某就補漕臣之乏憂深責重上何以格國下何以寬民哉昔者聞諸夫子曰百姓不足君孰與足某力之所及不敢不勉

謁文公 劉後村

烏庠魏：文公朱之夫子翼：考亭建之闕里竹林蕭：下有精廬於此授徒於此著書後十百年過者必式拜俯洒掃邑令之職昔祀于寢今遷于堂配以高弟皦如茲觴

謁韓文公 劉後村

烏虜先生立身之名節垂世之文章史臣比之山斗不可學也至於出牧潮表二州之人皆奉嘗之至今則某願師去其萬一焉祇事之初敢告

謁濂溪祠

劉後村

本朝至熙寧間事始多而法稍密矣先生於是時奉使嶺外能使遺民奉嘗之至今此後學之所當師法也詩不云乎誰謂華高企其齊而

祝文清公游默齋

揚大雷

惟公伊川之後何其芬芬乎吾視祭悲之幸其有御史焉南軒之後何其泯泯乎吾視韓傷之幸其有先生焉故先生之道脉最的師傅最正其高明而密察者簡而文也其剛勁而脩潔者聖之清也一默所詣與曾參之唯同科一誠之會與顏氏之克同夢學宮翼如遺像儼如籩豆秩如與刑在如其謹率諸生以共秋在肅如
祝文

謁諸廟

方秋崖

某蒙恩假守蓋與爾明神分職于是邦使曲如鈎濁如泥而貪如狼某則罪矣爾明神其極去之時雨暘平寒暑使物不疵癘而年穀豐熟則將誰責而可某亦不敢不以告

謁諸廟

劉後村

國家秩祀百神選任群吏凡以為民也吏無愧於民斯無愧於神矣神有德於民斯有德於吏夫某與神皆當勉之敢告

諸廟祈雨

劉後村

某于茲守土荷神之休四封之內良苗滿野汝旬不雨已覺亢乾一稔之望在民甚切常賜之谷在吏甚恐辦香稽首神其格斯油然沛然以相歲事

諸廟祈雨

方秋崖

中夏大雩月令也相彼南畝維其龜矣有亢者苗亦既萎

矣吁嗟雪兮雨其時也

城隍祈雨

戴家麓

吏以三年濫宰斯邑神以累世血食此邦歲之豐凶吏與神均任其責矧令早田既穗一雨頌愆雖吏之過亦神之羞敢以誠告于神函請于帝大霈甘靈相我豐年則吏之與神其責塞矣

諸廟再禱

劉後村

某屬以庚子禱于祠下爰及癸卯天瓢翻馮一溉之餘旱苗小蘇俄復開霽焦卷如初連朝雨意風吹雲閣谷孰執哉由吏德薄不腆蒞幣且祈願續前功神亦有依

諸廟謝雨

劉後村

某垂去禱雨人哂其迂神獨顧歆如鼓應袍甘靈達旦焦卷者甦煦：原田今飽昔茶坐使愁歎轉為歌呼神功昭昭汝忘之乎危酒不于神必我乎

祝文

諸廟祈晴

劉後村

烏虜昔者雨禱而止曰倍熟民大喜曾幾日雨不休民皇皇喜者憂民無辜咎在吏神其忍虧一簣決雲霧舒糶民歌舞神樂康

庵山祈晴建陽

劉後村

烏虜穀自布種下扶以至于秀實其成之艱矣農自于耜舉趾以至于刈穫其致之勞矣忽雨不止坐妨收藏烏虜成之艱致之勞者豈不甚可惜乎天乎神乎忍為之乎某憫農夫之勤苦悼小民之怨咨耳簷溜如聞啼號目嘉穀如割心髓奔走群望未臻嘉應惟神受百年血食之奉主一方雨暘之權用敢躬謁祠下稽首祈哀神其驅掃陰霧軒靈霽華既全歲功亦活民命

諸廟謝晴

烏虜秋冬之交兼旬陰霾坐憂嘉穀化為荒萊惟神之仁

灾

謂民孔哀歛雲岬岫杲日昭回場圃之間歡聲如雷晴本愆期雨不為哉神於吾民真有恩哉迺挹澗泉注此一杯

蓋竹廟謝晴

劉後村

九月庚辰至于乙未淫雨不止幾敗歲事其恐懼齋祓乞靈于神升車而蒼溜止出郭而宇氣清疑廟而午霧開返舍而暮霞出如是旬浹霽畢被野田里相慶場圃畢功烏辱神所以廟食吾邑歷數百年如一日者豈偶然哉不腆卮酒敬答靈貺

祝文

寶慶乙酉通奉大夫

劉後村

先君之渡十有三年不肖孤克莊皇之恟行路萬里始忝朝籍而贈先君三品烏虜所以顯揚其親者如此可謂微矣雖然國恩也君命也知君之教也不敢不告

紹定戊子

正奉大夫

劉後村

今上初郊詔加先君品惟中年不肖孤克莊試邑秩滿始奉綸命歸白松楸夫君恩未易報先訓未易承也敢不懼哉

紹定辛卯宣奉大夫

劉後村

去秋天子有事于明堂加惠溥率無間幽隱克莊雖觸罪奉祠猶得以追榮先君烏虜罔極之恩不可報已往之過不可追方來之善猶可勉也惟忠惟孝可答君父敢奉新命以告

紹定癸巳銀青

劉後村

迺者明禋禮成祭澤優渥小大之臣皆得以榮其親於是先君復進兩秩夫官至二品其儀与物亦稍異矣豈非聖王之隆恩先君之盛德乎克莊等敬奉所謂暈錦網袋者白之松楸

嘉熙丁酉特進

劉後村

去秋裡祀先君以三子陞朝進秩二等明年冬克莊免官
還里克遜懷詔過家克剛方忝邑寄命墊共奉制書白于
墓下自官制行而特進爲丞相官寵光之萃戶門極其厚
矣忠孝以報君父可不勉乎

嘉熙己亥少保

劉後村

垂保古之三孤今之一品仕而致身于此者幾何人哉沒
而系官至此者又幾何人哉推朝廷之優恩与門戶之積
慶敬奉綸言白之松楸

淳祐癸卯少師

劉後村

國家於祭澤無所靳於贈典有所止師臣極品不可以復
加矣然音容之隔一世矣宰上之木參天矣諸孤或仕或
止燎黃者七始拜今命寵光之隆異歲月之久長雖榮也
抑所以為懼也惟忠惟孝盍各勉旃

淳祐己酉齊國夫人

劉後村

去秋裡霈吾母自魏封齊綸言及門已不及見嗚呼若子
若孫謂迎錦誥拜于膝下安知乃奉蜜章燎於原頭耶逝
者有知必歆君命嗚呼痛哉

端平乙未安人

劉後村

日者國有慶典中外命婦序進有差而君蚤矣獨不及見
茲以祭澤始霈再命夫死生契闊人世之至痛也存沒哀
榮朝廷之異恩也日吉時良燎黃于阡君其敬共答休寵

淳祐癸卯且人

劉後村

屬者裡祀上有異恩加惠羣臣及其妻息強甫忝初補且
人加三命於是西樓宰木已拱烏虜白日長夜之訣余固
已沉恨於一生矣昭天漏泉之澤君得无少慰於九原耶

淳祐己酉恭人

劉後村

頃侍旃屢記禮徹章叨奉綸言進秩元士雖不旋人去國
然祭澤之行无間中外明甫登臚仕恭人加封爵烏虜父

子夫婦蒙被國恩如此將何以爲報哉敢告

新編翰苑新書卷之十一

別集

祝文

俞朝富

新編翰苑新書卷之十二

別集

祭文

祭晦庵朱文公墓文

唐石九峯兮矯如龍游峯下寒泉兮玉脂浮浮中有蓋世
翁兮一丘翁不見兮焉求四書兮翁在此亦既見兮九峯山
水竭吾力兮不能忘金風吹松兮琅琅溪並峯兮石啣
足角巾露衣兮來薦秋菊窮源兮大林谷古木千章兮珮
鳴鏘鏘仙人來兮紫陽視世鷲鷲兮聖哲皇皇昔可謂兮雲
一壑來日大難兮九原又不可作歸去讀吾書兮猶自可

樂尚饗

祭杜丞相代太學

方秋崖

嗚呼天下不見司馬文正之忠清粹德兮於今百六十有
二年世道之升降凡幾人材之消長凡幾蓋有不勝其慨

別集

卷之十二

然者矣而公方起從海濱共更化絃一時之兒童走卒亦
皆論名氏兮而都人士之攀緣相登爭覩其儀形者亦皆
咨嗟太息以為甚矣其似文正也是何退然山澤之儒臞
如列仙上方舉國以聽焉而四方顯顯延頸踵踵以望太
平之期兮柰何乎心勦神疲於應物其曾中之所欲為者
曾微江河之一涓雖移疾者凄然猶國有著龜士有砥柱
君不見其運動兮而君子恃之以無恐小人龍臺焉而莫前
今夫矣而未遇復矣而未泰兮政升降消長之一機也而
公乃騎箕尾而捨旃將恐上心漠然於此矣而元衮亦無
與相彌縫兮凡吾黨之所扼腕者固匪人之所垂涎天下
之勢方如駕漏舟於風濤浩渺之衝兮忽檝摧而維絕則
旁觀之損神亦不自竟其失聲而呼天試嘗評之公之與
文正其清介同其公忠同其夙夜盡瘁以遺其身者無不
同兮獨秉國不及於踰年而青苗助役之未入然而青山
流水居無五畝之園以獨樂花木之秀野而藝風煙兮則
公之貧又似乎差賢意公之心使朝廷清明常如今日不
至於變怪雜出舞魴鱔而號狐狸兮羌瞑目於九泉古所
謂死而後已者其公之謂兮吾為天下悲而已矣不自知
其涕漣

祭鄭丞相文

劉後村

曩遭詩禍幾置臺獄公在瑣闥力解當軸端平爰立擢太
尉掾思堂密詢翹館燕見嗟我於公合非勢利相賞文字
相勉道義丙申之斥流落稍久書來慰籍期我無垢丙午
之斥冒雪祖道自方田晝期我鄒浩再相五年我卧空谷
初辭弓旌繼罹風木晚迫而起公愈貴重豈無愚筮猶冀
採用我欲白事公罕揖客光範之門累月掃迹乞骸掛冠
疏至八九匪曰繫身實懼濡首他人受知一身而止我銜
公恩昆弟父子百口托公隻手如翼一日無公牽臂彈戈

衆方迫切訶罵佛祖我獨迂緩援引馬呂勸容直言勸收
善類為鼓邪說為懷私意及條故事及進密疏為傲後福
為沽虛譽或云范公稍恠守道亦曰涑水欲逐坡老匪公
厭倦實我窮薄白簡誅心青雲失脚尚意汾陽考二十四
且謂潞國壽九十二萬一他日訪公于鄧午橋酒邊半山
驢後憶初出書飛慙惜別寧料此行遂與公訣舊學之尊
上宰之貴黼衣輟朝玉鉞卓地而况諸生視公猶父山川
脩阻不克奔赴公來現身公去振臂公無生滅我有榮悴
舉世攻訐獨公嗟惜嚴光狂態劉蕡風疾邪說私意則已
順受虛言安在後福奚有惟今之人尤工論議先以為合
後世為貳嗚呼剖骨出心枯骨見血公昔當國容有未察
捨之則藏死而後已公今在天其知之矣

祭游丞相文

劉後村

於惟 聖宋名相比肩萊公英偉或惜其學之未至涑水

純粹或疑其才之稍偏堂堂克齋庶幾於全其師旨後溪
之密付其家訓忠公之嫡傳其論諫古人之遺直其文章
天下之至言其溫如春其重如山其虛如谷其靜如淵室
紹之初已抱負夔高之望端嘉而後遂伯仲韓富之間方
爰立皆伏其德量既退處猶問其貌年儻斯世之欲治盍
再秉乎化權意歸袞之有日忽騎箕而登天淒善類之相
吊致遺恨於逝川惜當國之尤淺竟齋志於重泉使久居
於齋諧且傍無於撓牽其立政與造事必揜後而光前烏
虜此謂之愛公可也要未為知公者焉祁國梁溪僅三數
月上印而去不失為賢苟為不然雖久且專潞公晚節出
涕於落旄鉞槐相遺命祝髮以易貂蟬孰如我公得閑於
亡恙之日舜寵於未厭之先於心無一毫之餒矣是氣塞
兩間而浩然宜乎生荷重名歿錫美謚勒之鍾鼎垂之簡
言念昔者甲午初元麟寺樞府兩相周旋每嘉史草亦焚

奏篇公既登庸我復招延十年又斥一日驟遷幸典故之
稀闕越尺度之拘牽雖薄材慙於韓陸然昭代法乎溥乾
在廷斷斷獨公惓惓曾不旋踵局面覆翻公去廊廟我歸
田園去夏浪出宿痾沉綿作書訣公尚灑谷殘我猶偷生
公為飛仙士懷一飯矧出陶甄道之云遠阻哭墓阡些誅
卑宗尊鯽酸寒追記丙午攝之掖垣偶偕竹湖訪公留連
合詞勸公時事實難方欲為國立太平之基豈可使身無
一日之安公拱手曰某有去尔子各勉旃其詞之嚴色之
毅吾二人者退而歎曰此其所以為果山歟烏虜公與竹
湖莫起九原我著斯言以俟史官

祭蔡參政文

吳雨巖

天運難測天意難明朱夫子卒於庚申而公薨於己未甲
子甫一周哲人之萎者二天運竟何如耶翁季師友之並
自季公至公子孫父子也而處其道不為不行而亦未得

以盡行其道天意竟何如耶惟公德業人主知之士大夫
知之兒童走卒知之而其早辱公知亦自詭知公之萬一
者蓋衆寶皆有光惟大圭拱璧之光瑩而不為熒熒之光
衆樂皆有聲惟金鍾大鎔之聲和而不為嚶嚶之聲故公
之才不矜小能而可以尊主庇民開物成務是為有德之
才公之言不聘遊辭而可以悟主竟民詔今傳後是為有
德之言平時如不勝衣而其勇可以嬰逆鱗噬怒虎天下
之勇莫能加焉是為有德之勇三季儒士稱為宗師四海
善類目為宗主而未嘗沽之以取名惠闕之心如丹去國
之身似棄而未嘗矯之以為節荷蕢未必知孔氏之心
尹氏充不知孟子之志心之可知者有限而公之不可知
者無窮渾然蓋公之孝以誠又為造道之極致以知行為
進道之兩輪其成德若此故某嘗謂東坡言君實如麟如
鳳朱子言明道如祥雲如甘雨公之謂也山川幾年之鍾

萃國家幾年之涵養而又家學幾年之流傳師友幾年之磨琢而後至斯而遽止於斯耶嗚呼痛哉學傳諸老而若虛位至執政而若無公亦何憾於死蓋自今年孟春之槩以至未薨十日之書自言其死者屢矣曳杖之歌奠楹之夢夫子獨與賜言而他人不得聞嗚呼痛哉某辱公門墻深自植立梁木其壞榱桷何為而今而後可以推琴而絕絃矣公之言何日而忘予之悲何時而已三年心喪莫報知已

祭蔡天參文

李畏齋伯玉

導河之源積石崑崙始汪洋而大肆益廣遠而天淵沄惟公家世西山之孫文簡考亭之門既克積者累世乃發揮乎久軒行誼足以為縉紳之望道德足以動冕旒之尊作於其政則炎天之風旱歲之雨見乎其容則秋月之皎春陽之溫正色朝端則姦邪為之屏息祥刑外服則民自以為不寃故其進也善類皆從而拔茹其退也多士皆從而牽幡公雖遠避乎權勢肥遯於丘園而今有識之屬望謂當贊化而調元 胡山頽而梁壞而典刑之莫存某辱公心腹之知感公道義之言絮酒不得致千里之奠緘辭莫能挽三閭之菟嗟九原兮不作孰綱紀於斯文

祭蔡大參文

葉西澗夢鼎

山頽木壞哲人其萎此非人事之細故端有闕世道之盛衰文公既沒學出多歧高者馳幻誕之說拘者泥文義之疑矯者竊形似以蓋空中之質恠者飾艱深以文淺近之僻不有耆英孰挈綱維惟公以西山九峯為祖為父節齋竟軒為師合全軀與大用於實踐救善類之脉於瀕危一語弗酬接浙而馳故道合則黃扉紫闥重金而疊組不合則廬峯雲谷幅帽而深衣何蒼生之無福而天不憖一老之遺某依公通德閱歲將暮昔賦明月而慨千里之隔今

望教舍而無一會之期痛死生之未訣庸殄瘁以興悲薄
酌薦愧匪哭吾私

祭蔡大參文

湯東澗

嗚呼我登公門近甫踰月樽俎笑言歡猶未滅胡為轉頭
遽成死別駭訃書之僅來為慟哭而摧裂哀哉一見之頃
乃為千古之別嗚呼惟公襟懷陽春志操玉璽聖處窮探
國慮深切引裾廷爭中嘗激烈拂衣遠逝晚更勇決而笑
傲東山之野猶壁立南都之鐵天胡不相於斯文遽殞此
堂堂之傑昔嘗誦王會稽之語曰人物方眇然而蔡公遂
如此令人氣短而心折頃徒視為常言今乃知其愁絕嗟
人生克終之甚難必蓋棺而公論始別公雖不盡究其壯
猷天已竟全其大節持此見西山與考亭庶有藉手而無
愧色雖公高明獨矜懃拙念久敬之情深撫近別而悲徹
自聞公薨一飯再殮強書苦懷馳此薄折老淚如傾何暇

筆舌

祭魏參政文代趙相公

方秋崖

嗚呼蜀自三蘇公不作於今幾何年兮予嘗意其水忍而
山羞天地之秘寶韜光剗刺鬱屈而不平兮故其發也教
焉而有斐君子特立於西州學探遠古之奧文洗時俗之
陋而浩然於習中者自一宇宙兮蓋蹴訓故之圃而姬孔
之與游以其精微者治身以其粗淺者治世是心固將堯
舜吾君民兮而不知一葦抗之何以障百川於橫流彼誰
其秉國之均如重陰且霾日月為之晦冥兮而矯然獨鶴
之嘹唳乃欲空百鳥之喧啾抱遺經於荒遐之裔樂斯道
於寂寞之濱者與歲月而相忘兮亦既築山房於白鶴之
麓而眠雲卧雪吟風醉月侃侃乎其無物外之憂但遨嬉
於翰墨之林而秦篆漢籀流落人間者太山一毫芒兮至
其妙於心則伏羲以前之大易而筆於書則獲麟以後之

春秋忽雲翳之劃開豁中天其大夜下尺一趣諸老以來
歸兮人固以為適當太平之期願觀德化之成而衆君子
之聚在本朝者殆將人稷契而身伊周歷觀近歲諸賢之
志各欲出其力以救斯世之淪胥兮而彼蒼者天豈其不
欲平治耶胡駕言中道而推輶西山共頽而天目之老晉
陵之魁亦相繼而凋落兮獨吾白鶴山人在而且猶旁睨
如暴之局孤閣橫水之舟然庶幾其可以繫中外之望以
待天人之定兮而復乘雲氣騎箕尾渺松江以上征而不
為蒼生其小留疇昔之夜謁公南徐曰衆謹之不可息而
予亦信以為然兮及今見之則慨歎其為李西平之子而
嘉獎其為異於藏宮馬武之傳人生傾意氣耳故令聞公
之喪書喟而夜吁兮而况朝失元老士失宗儒其將付斯
世於悠悠乃作白鶴之些曰白鶴飛兮山之幽梳雪羽兮
風颼颼時不與兮吾誰尤白鶴兮河之洲蘇臺香兮雲正

愁嘆華表兮天知否

路祭真西山文

劉後村

烏虜先生屬疾聞者齋咨上對近臣玉色不怡丞相移書
千里迎鑿下至閭巷婦女童兒皆曰哲人必介壽祺云何
一夕去而騎箕在昔范公方古尚夔晚登政府不至冢司
學者至今致恨於斯然其謨畫畧已設施先生視彼則尤
可悲平生修方未試乃圭謂天無意斯文在茲謂天有意
一老不遺太平之望竟復何時禮樂之興百年待誰烏虜
昔者之來大帶深衣都人聚觀公歸何逢今者之還丹旒
素惟都人相吊公去安之矧二三子久從吾師要經執紼
於禮則宜屬畏簡書僅至江湄覆此一觴慟哭以辭嗚呼
哀哉

祭虛齋趙端明文

劉後村

才非果難難於全媿勝流高虛下調鹿麕鄙公則異是体用

兼該以理揆事以德勝才磔寇破推郡化焦土公握兩拳
禦萬豺虎鄣卒反側公往建牙宥脅梟畔肅然無譁公甚
柔儒公不嚴酷惟廉惟恕羣狡龍言服入繫金狨出佩玉麟
王曰遑歸余無親臣延和已見緝熙故事箕歛民怨木妖
國敵發明節卦規切斜封公每造膝天為改容流傳方口
照映千載謂余不信有諫草在凡今公卿貴則捐書公老
愈勤甚於癯儒易通一書開闢未有不知公者曰異洛叟
既徹乙覽默契宸衷此於伊川未嘗不同造物所靳非權
與位至於學識獨不輕畀公所造詣通玄入神非惟人媚
亦恐天嗔昨賀蒲輪勸堅鐵壁必不獲已迫而再出當世
要務不宜三緘兒女恩怨姑實勿談各書擊節君真愛我
傳聞開歲稍親藥裹心謂微恙不為深灾方作箋諭迺以
訃來烏虜幹方之略元凱叔子尋微之功康伯輔嗣或者
慕公主春時名今其往矣議論必平烏乎少小相與晚尤
雖竭尚可作碑呼公不起孰知我悲

祭游勉之侍郎文

劉後村

繾綣人亦有言聃非同傳屬續遺墨何共諄諄宰上之題
累吾故人我已七袞公小二歲白首哭公寧非倒置我才
雖竭尚可作碑呼公不起孰知我悲

於惟游氏遠矣淵源御史授業河南之門爰及默齋學于
南軒公稍後出以箎和埴兄之賢李師之嫡孫匪曰菁華
先植本根嘉定之末端平之元犯雷霆威進藥石言麟莫
羈係鳳肯啄吞或勸少貶腐鼠嚇鷄法從非責方面非尊
系詔上雍頻疏扣闕身不敢私君不可護本壞止足矧迫
耄愒力請得謝冥冥高騫一區之宅五畝之園徒倚茂密
掬弄潺湲名臣欲盡一老僅存品其清裁荒滂陳蕃訂其
細行管寧邠原昔仕鳴珂公不其轡每奉談塵亦同酒樽
公晚東歸我適南轅坎壈百謫久伏丘樊李痺偏枯併闕
寒溫耳聞山顛淚如河翻殄瘁情深哀誄詞繁空誦離

騷安能招魂烏呼哀哉

祭杜尚書文

方秋崖

鳳城岩堯湖山春只月戶雲房愜幽人只有癯者仙翩綸
巾只左吾詩書右孤尊只藐予過之孰主賓只借一道士
鄭子真只詩以吾盟不吾嗔只月窮星回幾何晨只橐兜
戟轟來宣旬只銘常勒鼎繁經綸只文昌太微履星辰只
天飛泥蟠邈無垠只駕朱兩轡適予閩只公既乘雲騎麒
麟只聿其祥琴迅義輪只敢拜稽首誅憑酋只植象環金
儼綏紳只學綠彝黃薦吾醇只列星在天杳音塵只詩情
不磨黯湖濬只

祭李祕監文

劉後村

龜山於京文定於檜初敬終基倏進俄退督之未相以譎
自蓋薦三十士往往名輩公當是時固嘗義豸居中幾何
旋踵斥外爾欲為者我不傳會我自立者爾焉能挽憶與

鐵庵博覽奏對於故紙中馳騁千載不著名氏獨現光恠
此必洞齋衆伏且駭柰何斯人留落嶺海彰施藻火被之
嵩瀨戛擊金石散為竿籟挑抉蟲魚形諸箋解家有論著
國無華采士為時惜年不公待烏呼疾病則亂魏使昏憤
歲晚語謬謝傳殂背公將易箚遺偈痛快譬之虛空豈有
成壞我嘗評公精博英邁詩學卜衛文律崔蔡自昔黨議
為措紳害知我罪我以俟萬代嗟同門生凋零誰在執別
纓聞訃驚贖老語諄諄聊寫悲慨

祭林武博文

劉後村

我嘗三入勸講代言君無一字及於脩門又嘗三黜貴權
嗔怒人畏傳染君愈親附念我暮齒諒我孤忠饋藥起疾
貽書擊蒙衆方排我荆舒揚墨君顧以為卿雲甫白世故
輪雲人心塹坑晚欲托君患難死生昨枉緘題恠非自札
酸風吹計白日永訣西山之門存者幾人又弱一个莫贖

百身烏乎學可謀斷僅教胄子才可董統乃牧斗壘得祿幾
何閑輒數暮寄巢蕭寺火輒隨之彼何人哉耆龐烜赫其
間分劑於君獨嗇祝釐不飽營棲未迂君則往矣家尤蕭
然始翁謫歿負骨歸窆後師夢奠守死不畔君背徇義勇
不可當今誰卹孤誰來赴喪卜用何山葬以曷日禮有匍
匐老無筋力誅不盡哀哭不成聲英爽如生豈隔幽明

祭鄭常博文

前人

烏虜自漢以來士以藝取童而習者不出科舉抄誦帖括
絺繪雕蟲芻狗既陳叩之空空君則異是網羅貫穿手不
釋卷亦不退轉衆作萎亦君獨老蒼它人衰竭君愈激昂
早列西山文字之錄中之秀岩筆削之局使之騰上鼓舞
雷風炎紹汪綦乾溥周洪挾負奇崛寡諧多迂暫牧揭陽
俄謫潢浦談滯周南甫客讓西帝曰巫陽女下招之豈無
汾陽力援太白九虎守關一鴻避弋葺履道宅繡善和書

韋間孤榜花外小車君房言語李邕碑板彼昏不見世有
具眼在昔老師高弟說說歲月電往存不數人前誅洞齋
未平幽憤柰何又傳苔泉凶問辛亥之役我扶羸軀心頗
羨君紅頰白鬚弃我而先理不可詰奇字誰問疑義誰質
扁舟來訪翰墨尚鮮東芻往吊筋力已憊天實孤我殲同
學者退老西河僅一商也平生苦心為書滿家傳之福郊
或付侯邑我迫頽齡涕不濡目故交欲盡如何勿哭

祭徐知郡文

方秋崖

始予栖遲如桐未絲璞未規也爨者薪之有別其澆孰予
奇也公顧曰嘻非熊非羆非虎貌也文士追隨一雄萬雌
獨已知也風櫛暑池高論炎義夜以曦也醉墨淋漓急驅
龍驪走蛟螭也予起鋤犂婦袖披披喜不貲也迎笑以嘻
謂非羣兒我著龜也曾幾何時東臯語離哽相持也聚散
參差而我心期鍼與磁也歲如何其物換星移天一涯也

簪盃勿逢于宦之岐或並馳也今我來思有傳者誰公其
萎也我心則疑天實生猗竟何為也風鬣霧鬣長鳴之達
孰與羈也煩劇之治如理琴絲愈剝也老筆聽辭如水
之漸潮之滋也落落松姿秀目踈眉休顯宜也立之文墀
則麟儀儀鳳師師也柰何乎噫濼溪之漪終一麾也有翮
者旗回鴈之陸古驛悲也時方俛俛放予茅茨莫尔咨也
歲則一暮凶問我貽涕漣而也曰阡有碑尔作銘詩謹勿
辭也朋友道墮絮酒則醕誰其醕也長夜渺瀰晤言如麈
今已而也下亭之祠有苞江籬尚薦詞也

祭岳武穆代徐宰

前人

神京鱗介腥衣裳三精霧塞天無光鼙啼鼙嘒紛披猖中
分宇宙尊犬羊誰其與者淪網常受計於虜扼我吭王心
凜凜天蒼蒼以次束縛歸朝堂自南自北諾已償焉用與
虜為斧斨為讎報仇胡不臧至今淮塹為河湟每觀王傳
心摧傷怒髮為立膽為張皇界予邑於祈閭聞王有像西
山岡欲往從之縈予觴簡書之嚴不我違今且去此何敢
忘牲肥酒香差日良金戈鐵馬山茫茫

祭致政徐君文

方烏山

某敬以生芻之奠祭于近故致政徐君之墓而言曰嗚呼
甲辰之歲余觸禍機歸扣君門麻鞋布衣君笑且迎握手
勞苦通夕縱談具我雞黍別去五載中心藏之遠聞君訃
吊賻不時嗚呼古人感激一飯昔者聖師脫驂舊館余獨
何為惘然死生恃有此心可通幽冥拙思之文敢銘君墓
不傳於今或侯於後持此報君於古庶幾君可起乎來歎
一卮

祭雪村處士文

方烏山

宋淳祐壬子二月甲戌雪村處士杜君清友卒于寢越三
日庚戌友入莆田方某以生芻之奠哭之日來樵幾一年

始識君與君會亦不過一再君死閱旬日始聞之而不自知其哀之深慟之久者也君為詩人不矜而腴常期君以貴君為世家不富而貧常期君以遠今也身不得一命年不滿五十哀人生之無據慟神埋之莫詰是何淺薄抑至斯極昔者期君嘗序君詩今者哭君遂撰君碑泮宮之梅君手所移梅存人亡如之何其勿悲尚享

祭鄭伯舉文

戴象麓

嗚呼蕉隍鹿得喪真反覆白牛犢禍福苦倚伏賓王繞責肩已感賈傳未幾舍先鵬傷哉好物不堅牢造化小兒一何酷吁嗟今之人名韁苦羈束到底竟成空羊亡兩城穀推兄獨超然笑傲升斗祿本期徜徉乎此生夫何白駒之隙一箭速吁嗟今之人利錐太犇逐所競皆毫芒蝸戰幾蠻觸惟兄獨恬然稍閑便濯足本期偃仰乎此身夫何黃梁之炊一夢熟吁嗟今之人心機空勞漉揮闔相戈矛狙

詎百鬼谷惟兄獨坦然略不事邊幅本期寬闊乎此心夫何海漚之滅一瞬倏以兄之子職恭親恩薦扇枕古黃香輟羹老頽叔自宜班尔衣瓌尔寂以盡百年之歡睦夫何慈闈八十正春風子舍俄驚日月促天理苦顛冥塞馬不為福嗚呼悲矣乎髮星星淚簌簌前年夫子正傷弓豈堪此來又埋玉黃昏寂寞倚門時人聞哭聲誰不哭婦博博中途苦脫輻千古斷弦哀鳶膠竟莫續弟悽悽誰共春此粟首尾救急難鴿原吊影獨子哀哀傷時感我夢依木苦無枝烏号止空屋嗚呼悲則悲矣某等以葭莩之親盟亦桑梓之鄉曲痛一別之不回嗟百身之何贖追往事於一時尚宛然而在目敵南樓宴朋族灑黃花之烏巾燒海棠之銀燭持蟹螯舞鸚鵡耳熱拊缶而呼嗚嗚慇懃勸我盃中醪已矣乎今無孔北海欲舉此酒將誰屬風月閑主人款客呼童僕設榻向窻紗一片紋湫三百六一子半子方

布鴉三點兩點又落鵲忽然西南風打舟拍手大笑驚起
邊韶腹已矣乎今無謝東山欲對此碁將誰屬野渡橫舟
落霞孤鶩有時得句動詩毫滿紙煙雲掃醉墨字字驪龍
珠縱橫草顛旭半天隻韻落人間壓倒池塘春草綠已矣
乎今無益東野欲和此詩將誰屬伯舉兄休休地一旅
亭人生一旅宿自古本無千歲翁必竟百年登鬼錄榮與
辱碁一局浮與沉酒一斛古今興亡詩一軸古來只此是
生涯此外形骸皆槁木生何足喜死何足哀區區涕泗皆
流俗

新編翰苑新書卷之十二

別集

王化壺



程